

# Сийрат дарслари (104-дарс). Қиёмат азоблари

Сийрат дарслари Шайх Муҳаммад Содик Муҳаммад Йосуф роҳимаҳуллоҳнинг  
«Бу – Расулуллоҳ солаллоҳу алайҳи васаллам» таржима китоблари ва  
“Ҳадис ва ҳаёт”нинг 19-жузъи асосида бериб борилади. Мавзуларнинг тўлиқ матни  
 билан танишиш учун китобнинг ўзига мурожаат этиш тавсия этилади.

13:01 / 25.09.2020 2496

415. Абу Ҳурайра розияллоҳу анҳудан ривоят қилинади:

«Расулуллоҳ солаллоҳу алайҳи васаллам: «**Қай бир тилла ёки кумуш соҳиби унинг ҳаққини адо этмас экан, албатта, Қиёмат куни бўлганда унинг учун оловдан бўлган тахтачалар тайёрланади. Улар жаҳаннам оловида қиздирилади. Сўнгра уларни пешонасига, икки ёнбошига ва орқасига босилади. Совуб қолиши билан яна қайтадан қиздирилади. Миқдори эллик минг йил бўлган кунда одамлар орасида ҳукм чиқарилгунча шундай қилинади. Кейин йўлинни билади: ё жаннатга, ёки дўзахга бўлади», дедилар.**

«Эй Аллоҳнинг Расули, туя-чи?» дейишди. У зот: «**Қай бир түя соҳиби ҳам унинг ҳаққини бермаса - сувга борган куни уни соғиши ҳам ҳаққидандир - албатта Қиёмат куни бўлса, уни у(туя)ларнинг олдига теп-текис, сип-силлиқ ерга ташлаб берилади. Уларнинг ҳаммаси битта бўталоғи ҳам қолмай тўпланади. Уни туёқлари билан босадилар, оғизлари билан тишлийдилар. Унинг олдидан бири ўтса, бошқаси қайтиб келаверади. Миқдори эллик минг йил бўлган кунда одамлар орасида ҳукм чиқарилгунча шундай қилинади. Кейин йўлинни билади: ё жаннатга, ёки дўзахга бўлади», дедилар.**

«Эй Аллоҳнинг Расули, қорамол ва қўй-чи?» дейишиди. «**Қай бир қорамол ва қўй соҳиби ҳам унинг ҳаққини бермаса, у албатта, Қиёмат куни бўлса уларнинг олдига теп-текис, сип-силлиқ ерга ташлаб берилади. Улардан бирортаси ҳам қолмайди. Уларни ичидаги шоҳи буралгани, шоҳсизи, шоҳи сингани бўлмайди. Уларнинг ҳаммаси шоҳи билан уни сузади ва туёғи билан тепкилайди. Унинг олдидан бири ўтса, бошқаси қайтиб келаверади. Микдори эллик минг йил бўлган кунда одамлар орасида ҳукм чиқарилгунча шундай қилинади. Кейин йўлинни кўради: ё жаннатга, ёки дўзахга», дедилар».**

*Бухорий ва Муслим ривоят қилишган.*

416. Абдуллоҳ ибн Умар розияллоҳу анҳумодан ривоят қилинади:

«Расулуллоҳ соллаллоҳу алайҳи васаллам фитр закотини хурмодан бир соъ ёки арпадан бир соъдан - қулга ҳам, ҳурга ҳам, кичикка ҳам, каттага ҳам - фарз қилдилар».

*Бухорий ва Муслим ривоят қилишган.*

**«Расулуллоҳ соллаллоҳу алайҳи васаллам» китобидан**